

বিভাজন বিভীষিকা স্মৃতি দিবস পালায়মুঙগ’ মন্ত্ৰি অকীরা

মন্ত্ৰি বখ’রকনি তীয়দুলমুঙবাই হাকতর তাবুক কায়সা ফানগীনাং হাকতর হিনাই সিনিজাকখা

১৯৪৭ বিসিনি হাকতর বাকজাকমুঙগ’ হাকতরনি লুকুরগনি বিসিংগ’ কায়সা কতরমা কীসা আংখা। হাকতরনি বীসকাঙনি আচায়সঙ হাইয়াখেবা রীঙসীরাঙনাইরগ হাকতর বাকজাকমানি কুবুই লাইবুমান’ সিনানি নাংকুগ’। তাম’নি হিনবা লাইবুমানি বিসিংতাইন’ সীরাঙগীই থিনাঙনি ফাইসিংগ’ সীকাঙগীই মান’। বাকমানি বিসিংতাই জেফুরু ফান’ সীকাঙগীই মানয়া। থাংনাই ১৪ আগস্টঅ আগরতলানি এমবিবি কলেজনি রবীন্দ্র হলঅ সঙচাজাক হাকতর বাকজাকমান’ তীয়ই বিভাজন-বিভীষিকা স্মৃতি দিবস পালায়মুঙ পানদাঅ নারুটাই অকীরা আংগীই কক নারীকফুরু অ কক সাখা মন্ত্ৰি অকীরা প্রফেসর (ডা.) মানিক সাহা। পানদাঅ মন্ত্ৰি অকীরা সাখা, হাকতর খাকজাকমানি বাগীই আফুরনি তঙকসঙ লুকুরগনি তেকত, চবা, মানজাকমুঙ তেই বরগনি য়াফারমানিন’ বরম য়াফারনানি নাহারমুঙগ’ন’ অ সাল পালায়জাকখা। হাকতর খাকজাকমানি উকলগ’ তঙগ’ আ জরানি খীঙরীঙনি মারি, আবরগ হাকতরনি কোটি কোটি এবা রীজাক রীজাক বরকনি লাংমানি মানীয়-খীনীয়, বরম মারি মায়াকারমানি ফের আংগীই বীচাখা। বীসকাঙনি আচায়সঙন’ আ লাইবুমারগন’ মুইতু খীলায় রিউই রিনানি নাংনাই।

মন্ত্ৰি অকীরা সাখা, মন্ত্ৰি বখ’রক নরেন্দ্র মোদিনি কক কীচারমুঙবাই ২০২১ বিসিনি সিমি ১৪ আগস্টনি সালন’ হাকতরনি বিভাজন-বিভীষিকা স্মৃতি দিবস হিনাই পালায়জাকখা। ব সাখা, চীঙ জতন’ থানসা তেই হজাক তঙনানি নাংনাই থিনাঙগ’ অব’হাই মুঙসা তঙহালক আংয়ানি বাগীই। মন্ত্ৰি বখ’রকনি তীয়দুলমুঙবাই হাকতর তাবুক কায়সা ফানগীনাং হাকতর হিনাই সিনিজাকখা। হাকতরনি থানসান’ মীথাঙগীই তেই হাকতরন’ কাহামকুক তাই হামসাজাক ত্রিপুরা সীনামনানি নাহারমুঙগ’ জত’ন’ সীকাঙগীই ফায়নানি নাংনাই।

পানদাঅ কুচুক রীঙ নাইখুঙনি মন্ত্ৰি কিশোর বর্মণ সাখা, হাকতর বাকজাকমানি লাইবুমা ভারতনি বাগীই কায়সা কেসেকেরেথনি বেরেম। অম’হাই সাল ভারতঅ তেই কিফিলীই ফায়য়াতাইখে য়াপিরি রমনা নাংনাই। ব সাখা, জেসা হাকতর যকমুঙনি সালন’ আংখা তঙথথক, খাতুঙমুঙ তেই খা সীরাঙমানি সাল। ফিয়া ভারত হাকতর ১৯৪৭ বিসিঅ আ তঙথকমুঙন’ জত’ য়াচাগীই মানলিয়া। তামনি হিনবা লুকুরগনি খানি বিসিংগ’ তঙগ’ হাকতর বাকজাকমানি পাইফীলাইয়া কীসা। হাকতর বাকজাকমানি বাগীই হাকতরনি রীজাক রীজাক এবা কোটি কোটি বরকরগ রি বুকচা আংলাইখা। আ কুবুই লাইবুমান’ বরকরগনি খাত তনিনানি নাহারমুঙগ’ন’ ২০২১ বিসিনি সিমি হাকতর গীনাংগীই অ সাল পালায়জাগ’।

পানদাঅ মানজাক ফায়খা ফুড, সিভিল সাপ্লাইজ অ্যান্ড কনজিউমার নাইখুঙনি মন্ত্ৰি সুশান্ত চৌধুরী কুচুক রীঙ নাইখুঙনি স্পেশাল সেক্রেটারি রাভেল হেমেন্দ্র কুমার তেই দাগিফাঙ অনিমেস দেববর্মা। পানদাঅ লামসর্গীই কক নারীকখা এমবিবি কলেজনি ভিসি প্রফেসর ড. বিভাস দেব তেই হামবাই য়াফারীই কক নারীকখা এমবিবি কলেজনি প্রিন্সিপাল ড. নির্মল ভদ্র। পানদাঅ হর ঘর তিরঙ্গা অভিযাননি আংগীই রীঙ সীরাঙনাইরগনি বিসিংগ’ তিরঙ্গা রঙ্গোলি বাতায়লায়মুঙগ’ কীপলায় আংনাইরগন’ সকাৎ য়াফারখা। মন্ত্ৰি অকীরা প্রফেসর (ডা.) মানিক সাহা কীপলায় আংনাইরগনি য়াগ’ সকাৎ য়াফারীই রিখা।